



PORTAVÓS VI GOVERN U KONSTITUSIONÁL



KOMUNIKADU BA MEDIA

Díli, Loron 9 fulan-dezemburu tinan 2016

Lei Orsamentu Jerál Estadu tinan 2017 nian sai husi Parlamentu Nasionál ho aprovasaun iha lian ida de'it

Iha loron 9 fulan-dezemburu, Orsamentu Jerál Estadu nian ba tinan 2017, ne'ebé Governu Konstitusionál VI apresenta ona, pasa iha Parlamentu Nasionál ho votu afavor hamutuk 60, laiha ida maka kontra no laiha abstenasaun. Orsamentu ne'ebé hetan aprovasaun ne'e ninia montante total maka dolar amerikanu millaun 1.386, 826, ne'ebé fahe liuliu ba kategoria sira hanesan Vensimentu no Saláriu, hamutuk dolar millaun 209,701, Beins no Servisu hamutuk dolar millaun 395,047, Transferénsia Públika, hamutuk dolar millaun 420,964, Kapitál Menór hamutuk dolar millaun 12,075, no Kapitál Dezenvolvimentu (inklui Fundu Infraestrutura no Empréstimu), hamutuk dolar millaun 394, 039.

Votasaun liu hotu tiha, Primeiru-Ministru, Rui Maria de Araújo, agradese ba deputadu sira hotu ba "debate kona-ba Orsamentu Jerál Estadu nian ba tinan 2017 ne'ebé hala'o ho dalan demokrátika no konstrutiva" no observa katak ba Governu votasaun iha lian ida de'it ne'e "reprezenta votu konfiansa nian ida, votu ida ne'e maka Governu Konstitusionál VI, to'o loron dahikus husi serbisu ne'ebé nia hala'o, hakarak atu fó onra, hodi serbisu ho empreñu ne'ebé boot liután ba Povu no ba nasaun".

Proposta inisiál Orsamentu ne'e nian ne'ebé Governu apresenta ona hetan tiha ona apresiasaun iha jeneralidade no hetan aprovasaun ho lian ida de'it iha loron 25 fulan-novemburu. Hafoin sesaun pergunta no debate nian sira kona-ba kestaun oioin, deputadu sira apresenta proposta alterasaun nian kurakuran 80 ne'ebé maka hetan ona konsiderasaun husi Komisaun Eventuál ba Rekolla no Análize kona-ba Proposta Alterasaun Konsensuál sira ba Proposta Lei, ne'ebé Parlamentu Nasionál harii. Primeiru-Ministru haree katak desizaun hodi harii Komisaun ne'e loke dalan ba diskusaun ida ne'ebé "nakloke no demokrátika" no adosaun ba alterasaun hirak ne'ebé propoin ona "sein kompromete limite másimu ne'ebé mak estabese ona iha inísiu no la kontraria kompromisu Governu nian kona-ba implementasaun projetu, programa no atividade sira ne'ebé propoin ona ba tinan 2017".

Molok votasaun ikus iha loron 9 fulan-dezemburu, Orsamentu ne'e liuhusi debate iha plenáriu no hetan votasaun iha especialidade, ho análise ba artigu ida-idak husi projetu Lei ne'e. Lei Orsamentu Jerál Estadu nian ba tinan 2017 oras ne'e daudaun sei apresenta ba Prezidente Repúblika, Taur Matan Ruak, atubele hetan promulgasaun.

Atu remata sesaun ikus iha Parlamentu Nasionál, Primeiru-Ministru hateten fila-fali "kompromisu atu lori to'o rohan programa sira husi ninia mandatu" hodi permite "dinamiza ekonomia la'ós-petrolífera no hodi hasa'e sustentabilidade husi ita-nia projetu dezenvolvimentu nian."**REMATA**



Agio Pereira

+670 7723 0011

agio.pereira@cdm.gov.tl

govtlmedia@gmail.com

www.timor-leste.gov.tl